

日本
撰述

本朝高僧傳


四二
三

特279-318



279

318



始



第四百七十七號

圖書省部文

本朝高僧傳卷第二

濃州盛德沙門 師蠻 撰

法本一之二

唐福先寺沙門道璿傳

釋道璿唐許州衛氏即靈公之後也少齡慕道出家
 從定賓律師於東都大福先寺稟戒學律尋師習律
 三藏參嵩山普寂和尚探禪要質華嚴回福先寺教
 誨四衆日本普照榮睿聞風至寺申請東征以天平
 八年伴菩提仙那來是時本朝律學未備詔居太安
 寺西唐院為傳戒師學海深長教人不倦嘗謂所以

日本書紀 卷之二
成聖必依持戒講梵網經行事鈔註梵網經廣勸退
邇諷誦清亮調如金石聞者感悟四威儀中修淨行
品復勸學賓曰汝等如說修行經云若人依此而行
一切諸天魔梵龍神八部聲聞獨覺所不能動晚退
居和之比蘇寺著發願文四序季月修禮懺供一優
婆塞夢璿乘六牙白象著白衣向東而去明日遷化
天平寶字四年閏四月八日也享春秋五十有九臨
亡日依如幻三摩提下從六地依般若波羅密多上
盡八地與淨行品理相扶會璿與僕射吉備真備善
滅後僕射纂行實云

贊曰天平已前諸師不教戒法暨乎璿公專勸戒波
羅密而輦下僧侶始知持犯開遮矣匪啻冰雪外相
且亦牆壁內心觀平日之示趣臨終之善言而可知
焉曾子曰江漢以濯之秋陽以暴之僧中亦有斯人
唐大明寺沙門鑒真傳

釋鑒真揚州江陽縣人齊淳于髡之後也唐嗣聖四
年生總中俊敏器度宏恢早遊閭覺習記魯誥十四
隨父入大雲寺見佛陀像感動夙心啟求出家父奇
其志付智滿禪師循筭訓屬天后初元詔於天下度
僧乃爲息慈配住大雲神龍元年從道岸律師受菩薩

薩戒景龍初曆抵長安翼歲春依荊州恒景律師稟
具實際寺時年二十二觀光兩京講肆就融濟律師
學南山鈔依義威智全聽法礪疏前後九遍該三藏
研台教迨壯歲旋淮海教戒律住揚州大明寺化門
益熾輪下龍象祥彥法進等三十五人化主一方天
寶元年本邦榮睿普照屈寺聽講一日展拜日昔聖
德太子記曰我沒後二百年有異域人興隆真教今
鍾其運願和尚輟此方之化爲吾國之師真曰我聞
南嶽思禪師生彼爲王興暉佛法又聞長屋王製千
袈裟施此土一千沙門衣緣繡偈曰山川異域風月

一天寄諸佛子其結來緣思是佛法有緣之國也吾
當往矣天寶二年冬暮于祥彥道與思託法進等神
足二十五人賚經論若干帙佛器等若干與徒屬一
百八十五人同駕一船從揚子江至狼溝浦惡風俄
吹爲濤船碎潮水蘸腰寒苦難忍幸免登岸更修舟
楫過廣州溫州等五六州上名山遊巨剎緇白喜迎
受戒七年戊子春在揚州崇福寺真與睿照相謀造
船經卷佛器所載一如天寶二年又率祥彥神舍法
進思託等道俗舟師一百餘人季夏發崇福屈新河
帆海過常越州止署風山真夢緋綠衣三官人岸上

別拜既出洋中暴風怒濤水黑如墨舟人告曰船今將沒有何所惜棄禱海神欲投棧香籠時空中聲曰勿投棄又有神將介甲操仗各立舳艫尋時風定三日過蛇海其長三丈餘色如錦文三日過銀魚海魚長尺餘飛白翳滿空中五日經飛鳥海其大如人歷舟背沒拂之銜手出魚海之水俄泊一島有池清水甘美眾人爭吞各得飽滿明日欲料只見陸地稍得順風歷江州明州等十五州漸著中華之地飢渴難厄不可具述所到州牧縣主爲難遭想建寺築壇聞法受戒禮讚供養檀嚙切充凡在逆旅十有三年其

間泛海至第五回相載珍寶如初發時風濤所沮快快不止又旋揚州歷司龍興近光等巨刹天寶十二年冬十月大使特進藤原河清副使銀青光祿大夫大伴胡萬聞真之宿志屈近光寺堅請東渡真復相共法進思託等高弟三十五人乘大伴氏船天平勝寶五年十二月著薩之秋妻屋浦寓太宰府翌載二月達攝之難波唐僧崇道等迎慰供養亞相仲麻呂藤公遣使問候既入南京敕正議大夫安宿王出羅城門拜迎慰勞館於東大寺天竺菩提仙那唐道璿謁見慰問公卿士庶奔波作禮真乃以佛舍利三千

粒彌陀藥師彌勒觀音像各一軀華嚴經八十卷涅槃經四十卷佛名經十六卷止觀玄義文句六十卷四分律七十卷法蘊律師四分疏十卷智首律師菩薩戒疏五卷定賓律師飭宗義記補釋宗記各一卷觀音寺高律師義記十卷道宣律師含注戒本戒壇圖經各一卷懷道律師戒本疏四卷玄奘法師西域記十一卷阿育王塔樣金銅支提王懷水精手幡四枚菩提樹子三斗王右軍真行書一卷等上表進呈聖武皇帝遣正議大夫吉備真備傳宣遠凌鯨波而來入此國其志可貴朕建東大寺既經十年欲立戒

壇爲僧尼受戒法以無師範素志未果今幸卿暨孔愜朕意自今授戒傳律之任一以委之乃授傳燈大法師位茲歲四月建戒壇於盧遮那殿前上皇始受菩薩大戒相尋皇帝太后太子公卿同受戒法四百三十餘人真摘相葉蕃說本文戒於是一時高德靈福賢璟志忠善頂道緣平德忍基善謝行潛行忍八十餘僧棄舊新受是本朝登壇授戒之始也真後建戒壇院於大殿之西又特院北剎唐禪院熾啟四衆七年二月賜皇子開府儀同新田部之邸別建梵刹永爲戒場眞嘗地味爲堪結果建營未始上皇崩殂

孝謙帝嗣欽真德崇信特膺是夏任大僧都轉大僧
正兼司法務冬十一月割備州膏腴一千畝納唐禪
院薦上皇也天平寶字元年賜號大和尚真惠綱務
故有此授真乃以千畝稅經營伽藍敕藤高房監護
造事三年僞功律寺所備與然有序號唐招提寺詔
築戒壇帝乃受菩薩大戒公卿百僚一等受戒因詔
天下諸宗度者先入招提受戒學律由是四方趨嚮
戒法鼎盛四年夏詔啟梵網會以資上皇五年春真
奏下野藥師寺築紫觀音寺各建戒壇充東西戒學
也真在唐時梵僧遺以祇園靈土三斗所築戒壇比

塗其土而規制偏秉法於南山圖經七年春忍基夢
講堂棟折以爲遷化之相無何真告衆曰仲夏六日
化緣盡矣至期面西跏趺而逝摩頂尚煖延殮三日
顏不異常葬於寺之良隅香氣滿山谷黑白走喪報
齡七十有七坐臘五十有五唐國諸寺聞真訃音各
著喪服向東舉哀設大會齋於龍興寺云受戒弟子
四萬餘人嗣其法者法進思託仁韓法顯曇靜法載
義靜法成智威靈曜懷謙慧雲如寶慧良慧達慧常
慧喜總三十餘人真神異流辯優得二嚴講法勵疏
四十遍行事鈔七十餘遍羯磨疏輕重儀各十遍手

寫一切經總三藏修造伽藍八十餘所開無遮大會若干場製袈裟三千領施五臺諸山衆僧初浮海時金字大乘經五部伽梨褊衫鐵鉢坐具各一千法具佛像米錢藥艸滿載大舸其在唐講律時石軼浮圖放光又有菩薩稱般若仙現三目六臂讚歎而去或授戒降甘露或振錫慈泉出舍利放光神人守護厄渡海時日南瘴氣兩目失明而大藏文句多所暗記故救真正差誤上足思託律師白衣弟子真人玄開各撰東征傳一卷

贊曰世有菩薩乘之人朝必有聖知之君此全依有人法時處之緣也真公垂耳順浴魚鳥海陷龍蛇鄉飄寄身命旅泊於三十五州所到官宰挽留衣祴竟歷十二年弘願素亨聖王迎爲戒師戒壇招提爰始經營廣導四部以萬善之地其嘗險阻也如玄井躡西域其持毘尼也似道宣住南山其乘嘉運鋪法寶者固富於真公也於戲諸家崇以爲本朝弘律之宗祖豈無因緣而然耶

林邑國沙門佛哲傳

釋佛哲林邑國人入南天竺從菩提仙那稟佛教通密咒欲入海需如意珠賑濟衆生貧苦乃浮南海以

密咒召龍王咒縛索珠龍王良法力解髻珠將授之
哲右手結劔印舒左手以受焉龍王給曰昔娑竭龍
女獻寶珠世尊合掌受之痛哉像季佛弟子隻手受
之哲卽解印合爪受珠龍王得縛脫便入海底哲亡
然而歸唐開元中仙那誘入真丹本朝天平八年秋
七月復隨仙那來朝與仙那共住大安寺日受帝敬
哲多持密部來今只有悉曇章一卷本朝樂部中有
菩薩拔頭之舞林邑之樂哲之所傳也

系曰孔子曰不逆詐不億不信抑亦先覺者是賢乎
哲之爲龍王所給不足爲賢與通曰君子可欺以其
方如象詐於舜校人給子產雖聖賢而不可以實不
受之龍王以世尊之事質之哲公以佛弟子不逆詐
而以誠隨彼且抱疑心者佛之所誠也其所給亦宜
也焉

江州比睿山延曆寺沙門最澄傳

釋最澄本姓劉氏其先東漢孝獻帝之遠裔登萬王
吾應神帝之曆慕王化而來賜江州地采邑志賀葦
姓曰三津首也父百枝無嗣禱睿嶽神其妻乃娠以
神護景雲元年生於志賀邑七歲就家塾聰明無儔
十二投大安寺行表剃髮稟習唯識華嚴起信從鑿

真之徒聽天台疏受具足戒締菴睿山綜覈經論常
憂不見台教全文又往南京會見玄義文句止觀四
教義維摩經疏等是墜真之所帶來隨喜書寫宿智
洞曉爲衆講演延曆十六年以智行譽上供奉班明
年冬肇修十講會請南都七大寺名德十員輪次爲
講師今十一月法華會是其舊例也二十一年春正
月國子祭酒和氣弘世弟真綱屈善議勤操等十大
德於高雄山寺講說妙經澄爲證者帝使治部大輔
和氣入鹿賜敕宣稱之二十一年賜入唐求法詔返
以基月二十三年秋七月從遣唐使菅清公僅經三

旬達明州界乃德宗貞元二十季也九月至台州偶
刺史陸淳請荆溪上足智者七世孫道邃和尚於州
下龍興寺講敷止觀澄就見之遂授以一心三觀之
旨并菩薩大戒澄慮東歸有懷疑者乃造刺史陸公
作授證焉陸公署曰最澄闍梨身雖異域性實同源
特稟生知觸類玄解觀光上國傳教名賢遂公法師
總萬法於一心了殊途於三觀而最澄親承祕密理
絕名言猶慮他方學徒未能信受所請印記安可無
所憑乎因寫天台所傳疏記二百四十卷尋登天台嶺
見禪林寺行滿座主滿亦妙樂高第與澄以荆溪以

上諸籍祕蹟而曰智者大師言滅後二百餘歲我法
傳東國祖識有徵汝持此法當爲海東傳燈之始祖
二十一年如越州龍興寺遇順曉阿闍梨受三部灌
頂密教及得陀羅尼經書印契圖樣灌頂器物曉與
書曰昔開元朝三藏善無畏從佛國大那蘭陀寺傳
大法輪轉至大唐國傳付傳法弟子義林是國師大
阿闍梨也年一百三歲見今在新羅國轉大法輪又
付大唐弟子順曉亦是鎮國道場大德阿闍梨復付
日本國供奉大德弟子最澄轉大法輪最澄是第四
付屬令佛法永永不絕焉又於唐興縣參修然禪師

機語投契得達磨一派牛頭山法夏五月乘大使藤
賀能船著長州濱卽延曆二十四年也八月九日畿
內地震朝議奏澄爲國誦經仍降宣詔澄先獻唐國
佛像尋入京城表上西土所得天台密宗諸教文曰
竊以六爻探蹟猶局生滅之鄉百物正名未涉真如
之境豈若隨他權教之開三乘機路隨自實教之示
一乘道場哉然則妙法難傳流其道者聖帝圓教難
說演其義者天台伏惟陛下出宸承圖登極膺運東
夷之鄉化歸德於先年北蕃之來朝賀正於每歲於
是萬機之暇一乘惟懷冀得圓宗垂爲大訓由是妙

圓極教應聖代而流傳祕密真宗感皇緣而格止最澄奉使求法遠蹈靈蹤台嶺越疆躬寫教跡所獲經論疏記二百三十餘部并五百卷又金字法華金剛般若等經智者大師禪鎮白角如意等隨表奉進奉表以聞敕曰大唐受法供奉最澄阿闍梨傳來天台諸典籍流布天下宜爲七寺書寫七通卽給禁中上紙付國子祭酒和氣弘世監寫又詔道證守遵修圓勤操慈蘊慈寬等碩師於野寺常住寺令受學新寫天台教文又敕和氣弘世宜詔真言祕教未傳此方最澄阿闍梨幸得此法立爲國師九月一日敕於清

瀧峰高雄道場起都會大壇選道證修圓勤操正能延秀廣圓等八人受灌頂三摩耶小野岑守奉敕看護法事是本朝灌頂之始也是月敕於紫宸殿令修五佛頂法又選圓澄等名德受灌頂是宮中密灌之始也是時本朝大乘四家三論法相華嚴律宗也二十五年澄奏加新天台法華宗並爲五宗澄又慨念除三論法相外華嚴毘尼成實俱舍僅有名而無受業之徒一宗若廢則衆善不全非所以資政化興教法也特奏朝廷乞每歲加度僧一十二人五宗各一俱舍成實各一制可勝虞永忠奉表賀謝大同五年

正月宮中，金光明會始度天台，年分八人，光定善忠預焉。弘仁三年，建法華三昧堂，置智德者，長講相續。六年，春詣宇佐八幡宮講法華，神聞妙法，託言感喜，乃啟齋殿，賜紫衣二襲，其一鬱多羅，一袷衣，又赴唐時宿豐前，賀春山下夢梵僧來謁，右肩似人，左肩如石，曰：我賀春明神救我業報，我當加助求法，欲知其實，海中急難現光爲驗，澄明日見山，右邊巖崩宛如所夢，洋中風波果現光耀，澄及歸朝，建法華院，自創講經，是日豐前田河郡吏等錄寄紫雲覆賀春嶺，從此右巖漸生卅木，年年蕃茂，其法華院卽神宮院也。

六年八月，依弘世請於大安寺塔中院闡揚妙法，摧三乘之矛盾，準一乘之權衡，諸寺名德會集，伏膺澄立願造六寶塔，度六千部妙經，東州三所，中國二所，西邦一所，今睿山東西塔者，中國之二所也。是歲行東關寫法華二千部，一萬六千卷，上野下野各建一級塔，納八千卷，長講不絕。預經塔會者，綠野寺九萬人，大慈寺五萬人，所過諸州嚮化，類之。其過信州，見長阪無館，行客有難，乃募緣置廣濟廣極二院，往來受賜。十年三月上表乞建大乘戒壇於睿山，其條四科，具證緣起，降表南京，諸寺詳定，建否與福寺護命。

抗表斥之東大寺景深著迷方示正論舉二十八失
南都七寺毀唇喧越明年二月澄述顯戒論三卷表
進博引大乘戒文作顯戒緣起返詰二十八失又降
其書無敢間議者十二年春二月賜宸書傳燈大法
師位記六月三日澄奏狀言夫如來制戒機宜不同
衆生發心大小各別所以文殊豆盧上座殊位一師
十師羯摩各異伏望天台法華年分度者二人於比
睿山每年二月先帝國忌日依法華經制令得度受
戒從此一紀不聽出山四種三昧令得修練則一乘
圓宗戒定永傳山林精勤遠及長劫制可冀日四日

右脇寂於中道院春秋五十有六夏坐三十有七其
日睿峰有奇雲湖津道俗相共見之十有二日藤冬
嗣捧圓戒敕許之詔來冬十有一月御製哭澄上人
律詩贈於山曰尸嗟雙樹下戢化契如如慧遠名猶
駐支公業已虛艸深新廟塔松掩舊禪居燈燼殘空
座香煙續像爐法體何人住塵心傷有餘一時公卿
才子和送宸韻澄博經論兼知陰陽工巧醫方辨樞
機屬文章又稱多得人如義真圓澄光定圓仁等法
門之棟梁也右僕射藤冬嗣大中大夫大伴國道國
子祭酒和氣弘世朝請大夫和氣真綱問道竭力之

之魁也平生撰述註法華經十四卷註金光明經五卷註仁王經註無量義經各三卷顯法華義八卷天台靈應圖集守護國界章總持章各十卷法華輔照付法緣起長講願文新集聖經序各三卷灌頂儀式二卷照權實鏡金鑰論註決權實論內證佛法相承血脈譜六千部法華銘各一卷凡一百六十餘卷十四年春二月賜寺額曰延曆寺貞觀八年秋七月敕諡傳教大師

贊曰一聞台教理解互融時時拂拭傳牛頭風三部叛瀉修灌頂主開顯一乘發他師蒙剎創良嶽祝護聖躬為台宗祖法覃無窮垂九百歲允執其中智者懸識合節應期善言臨歿戒徒秉彝口無麤語手不罰筮淵乎澄師瞻之仰之

本朝高僧傳卷第二

日本地誌 本朝高僧傳卷之二

止

音訓

璿

旬緣切

暴

步木切 日乾也

髡

枯昆切

賈

廣西切

蕪

莊陌切

棧

將先切

物

而震切

相

苦本切

相

邦妹切

僞

鈕限切

塾

神六切

覈

胡得切

蹟

土韋切

驗

魚欠切 證也

盾

乳允切

斥

目石切

彪

呼回切

讖

楚禁切

麤

音粗

咥

抽知切

江府住玉泉軒成九居士信施淨財

本朝高僧傳卷二

茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺

知藏比丘

識

本朝高僧傳卷第三

濃州盛德沙門 師蠻 撰

法本一之三

紀州高野山金剛峯寺沙門空海傳

釋空海姓佐伯氏讚州多度郡人父田公母阿刀氏

夢梵僧入懷而有娠在胎十二月寶龜五年生裁在

孩穉更無他戲泥塑佛像替額讚禮十二外舅朝散

大夫阿刀大足教以世典善習文義十五隨舅氏上

洛博覽羣書十八入庠序就味酒淨成博士岡田學

毛詩左傳嘆曰儒書且淺佛法愈高作三教指歸旌

意乃從石淵勤操僧正受虛空藏未聞持法名山絕
巘專事修練躋阿州大龍嶽修供寶劍一枚忽落晴
天往土州室戶崎修誦五更明星飛來入口遂得悉
地堪任頭陀被葛涉冬絕穀過夏精進苦節朝懺暮
悔弱冠拜省操公於泉州槓尾山落髮受沙彌十戒
名曰如空研習三論學大小乘二十二登東大寺戒
壇稟具足戒而改空海向佛誓曰二乘十二部經有
疑未能決擇願垂加祐示我正法夢一僧告白有真
祕要名大毗盧遮那神變加持現在和州高市郡久
米道場東塔下卽如久米寺於塔柱下果得祕經是

養老年中善無畏三藏之所納度也披閱不解更增
惛漠因有南詢之志慕無畏之跡東大寺西南隅構
廬禪坐延曆二十三年夏五月乘遣唐使越前刺史
藤原能船秋八月著衡州界乃德宗貞元二十年矣
冬十二月屆長安城敕館宣陽坊官舍明年春又敕
居西明寺永忠法師古院巡遊諸刹拜謁青龍寺內
供奉慧果阿闍黎果大廣智不空三藏之高弟也一
見而喜曰吾待子久矣卽願諸徒曰是沙門者第三
地菩薩也當備香華以入密壇夏六月上旬入胎藏
界大曼荼羅沐五部灌頂水秋七月上旬入金剛界

大曼荼羅八月上旬授傳法阿闍黎位灌頂是日海
設五百僧齋徧施四眾果與金剛頂等諸密經并圖
畫曼陀羅及諸法具曰昔大毗盧遮那世尊以祕密
真言印付金剛薩埵薩埵傳龍猛菩薩展轉至大廣
智智爲三朝灌頂國師復付我子有瑜伽大乘根器
故我授此大法宜歸於本土傳敷國界然則四海安
泰萬民豐樂果又命畫工李真等十餘人圖胎金曼
荼羅一十鋪令鑄工楊忠信新造法具十五品集二
十餘輩經生寫三部祕經等及健陀國眾染一幅佛
舍利八十粒皆併付之海獻眾染一領雜寶手爐并

書一篇以謝法恩時果之法姪玉堂寺珍賀告果云
日本座主縱地上人元非門徒只可傳顯教何輒授
密典其夜賀夢神人來責過失詰朝到海之所懺悔
拜謝海又逢罽賓國般若三藏三藏曰我經歷五天
常誓傳燈來遊此土復欲浮海遊化東域今幸逢于
通我夙志卽與自譯華嚴六波羅密經及梵夾元和
元年秋八月歸當本朝大同改元敕令流通傳來密
乘嵯峨帝詔入宮會諸宗碩師各論所習海豎卽身
成佛之義諸家爭折之海辯論精敏帝思見所證海
卽入五藏三摩地觀頂涌五佛寶冠放五色光明三

論之道昌法相之源仁華嚴之道雄天台之圓澄等
皆見退澁弘仁元年冬十月上表請為國家修仁王
護國經於高尾山寺朝議制可帝敕諸山各述宗義
海據毗盧遮那經及菩提心論著十住心論配抵諸
宗立一家言第一曰異生羗羊心第二曰愚童持齋
心第三曰嬰童無良心第四曰唯蘊無我心第五曰
拔業因種心第六曰他緣大乘心第七曰覺心不生
心第八曰如實一道心第九曰極無自性心第十曰
祕密莊嚴心他家駁評而密者取法七年夏上紀州
高野山山神忽來道至平坦所施精藍地以償夙罪

初海在唐將歸之日執三鈷杵祈願曰密教入日域
久屬流傳此杵先占靈區即向本邦擲之其杵懸在
松枝海知有緣此地歸京上表曰山高則雲雨潤物
水積則魚龍產化是故嶠閣峻嶺能仁之迹不休孤
岸奇峰觀世之蹤相續尋其所由地勢自爾又有臺
嶺五寺禪客比肩天山一院定侶連袂是則國之寶
民之梁也伏惟我朝歷代皇帝留心佛乘金刹銀臺
櫛比朝野談義龍象每寺成林法之興隆於是足矣
但恨高山深嶺之四禪客幽藪窳窟希入定實實是
禪教未傳住處不相應之所致也今準禪經說深山

平地尤宜修禪空海少年日好涉覽山水從吉野南
行一日更向西去兩日程有平原幽地名曰高野計
當紀伊國伊度郡南四面高嶺人蹤絕跡今思上奉
爲國家下爲修行者艾蕪荒蕪聊建立修禪一院經
中有誠山河地水悉是國主之有也若比丘受用他
不許物卽犯盜罪者加以法之興廢悉繫天心若大
若小不敢自由望請蒙彼空地早遂小願然則四時
勤念以答雨露之施若天恩允許請宣付所司輕塵
宸展伏深悚越乃制可賜焉秋再躋高野山初精藍
日金剛峯寺十有一年賜宸奎傳燈法師位記明歲

讚州里民奏曰國有萬農池始自去年築之隄封工
大民少成功未期沙門空海此土入山中坐禪默觀
鳥狎海外求道虛往實歸因茲道俗欽風民庶望影
居則生徒成市出則追從如雲今離舊土常住京師
百姓戀之實如父母若聞其來必創履相迎伏請枉
之杖錫令濟其事制許之及海至州不日底績秋七
月新錢二萬施海十有三年平城太上皇就海受灌
頂法帝者密灌之始也十有四年賜以東寺海建灌
頂院準青龍寺每歲二序修灌頂法乃置慧果所住
健陀國架染及念珠爲寺鎮冬十一月奏以東寺爲

密場置五十比丘天長元年春三月旱重奉帝敕祈
雨於神泉苑愆期不雨海人三摩地見之守敏法師
咒諸龍接入一瓶奏延二日告諸徒曰池中有龍號
善女阿耨達池龍王之屬也現形則得悉地時金龍
浮水長可九尺弟子真雅實慧真曉真然等得見之
餘不能觀帝敕和氣真綱以幣物供神龍既而膏雨
大澍池水至壇霖沛三日天下皆洽敕加優賞河州
有寺龍池久涸請海加持清水俄涌今龍泉寺是也
此歲敕任僧都上表不受帝堅制不允二年丙午敕
改高尾神願寺名神護國祚真言寺賜海承和元年

奏乞準唐朝內道場置真言院於宮中敕以勘解由
司廳為曼荼羅道場每年正月始入日後一七日中
朝廷國家泰平修法至今不絕二年正月奏置試度
三人毗盧遮那經業金剛頂經業聲明業各一人承
和二年春三月在金剛峰寺共諸弟子唱彌勒寶號
二十一日結跏趺坐結毘盧印泊然氣絕蓋持定身
期龍華會也世齡六十有二法臘四十有三諸徒相
集修七七忌身體尚溫鬚髮日生稍過五旬劍落更
未封定全身疊石造壇樹率兜婆定後四日敕內舍
人贈賻弔慰太上皇弔喪降書曰真言洪匠密教宗

師邦家憑其護持動植荷其德惠登圖嶮嶮未逼無常遽侵速馳州書弔慰大定海妙用無方神異非一修不動使者法則身出火燄入水想觀則室內成池雕璩佛菩薩像徧滿國界嘗在豆州桂谷山寺以指向空寫大般若經至魔事品字畫巖然現於空中自此筆翰精工入神或拔五筆五行共書或畫水上墨痕不滅弘仁九年奉敕書大內南門諸額應天門額掛而見之應字點瘡海乃飛筆塗之毫無斜邪撰述尤多祕密曼荼羅十住心論十卷卽身成佛義七卷理趣經釋四卷胎藏界私記金剛界次第教王經義記文鏡祕府論各三卷大日經疏文次第大日經開題畧釋胎藏界廣記金剛界口決守護國界主經釋摩訶衍論指事各二卷大日經畧釋金剛頂經畧釋金剛界私記最勝王經畧釋法華經祕釋法華經品釋金剛私記瑜祇經行法記三摩耶戒作法真言問答書般若心經祕鍵等各一卷總計一百四十餘部二百二十餘卷其餘詩文見性靈集傳來佛舍利八十粒梵夾三經疏二百一十六部四百六十一卷諸曼荼羅寶器佛具不遑勝記延喜二十有一年賜諡弘法大師

贊曰瑜伽者梵語此翻相應身口意之三業感應妙
愜之謂也而又以信爲主意憑信而正者也空公一
代所修莫不憑信涌五佛冠作萬乘之師乘菩薩地
屈四宗之傑開南山董東寺留那伽身期龍華會兒
童走卒莫不尊弘法之名焉垂今八百餘載學金剛
定之末葉鋪衍于天下要路迺祖之信而有爲者若
是矣

京兆東山建仁寺沙門榮西傳

釋榮西號明菴備州吉備津人其先賀陽氏薩州刺
史貞政曾孫也母田氏夢明星現而卽有妊在胎八

月永治元年四月二十日明星出時生母忌期不滿
不乳三日而不呱不死沙門陽嚴誡之鞠育聰敏逸
羣八歲就父讀俱舍婆舍二論十一師事本郡安養
寺靜心十四祝髮登睿山壇受滿分戒十八依千命
法兄稟虛空藏求聞持法浴灌頂水苦修精礪屢見
靈感同儕嘲曰子有才辯身貌矮醜取笑於稠人廣
衆時西續口曰虛舜王於赤縣晏嬰相于齊國未聞
其長也嘲者羞澁西心實恥之因期百日修求聞持
法初入壇時刻身長於堂前柱愆期倚柱長於前四
寸餘十九學台教於睿山有辯習密乘於伯州基好

盡得蘊奧還睿山重受密灌於顯意細閱大藏掩關
八載常聽支那禪法之盛寄思南詢仁安三年夏四
月遂乘商舶著明州界宋孝宗乾道四年也時年二
十八會遇廣慧寺知賓之僧與之相語問曰日本有
禪乎西曰我邦台宗始祖傳教大師延曆末年入唐
傳台密禪三宗今台密盛禪滅久矣故航海來不知
得否知賓曰子欲究祖師禪拋下從前知見發得大
機精礪積年自然有契當分西聽而心服去屆丹丘
適逢本邦重源相伴登天台山見青龍於石橋拜羅
漢於餅峯供茶湯而感現異花於盞中上廬山返明

州詣阿育山見舍利放光是秋大阜郡主請西祈雨
修法之間西身發千光上燭霄漢于時大雨救賜千
光之號九月上浣重源相誘同船而歸乃以天台新
章疏三十餘部及台宗時彥酬酢之書呈座主明雲
雲公嘆曰子於支那揄揚台教實我國之光華也因
結菴山中混衆而居西復欲重渡震舟達於天竺二拜
釋迦八塔而終身於佛國門下侍郎平賴盛與西厚
常柅遠遊及侍郎卒以文治丁未夏再入宋域年四
十七徑趨臨安府行在所謁知府按撫侍郎表奏過
竺之事報曰曳半影於巖嶇棧道終全身於中平道

場然北蕃強大西域皆隸關塞不通何行之有素志不成復登台山昔虛菴啟禪師住萬年寺直往見之菴問傳聞日本密教其盛如端倪宗趣一句如何西谷曰初發心時便成正覺不動生死而至涅槃菴曰如子所言與吾宗一般掛搭參訊徹格外機淳熙之末菴移天童山西亦從侍紹熙二年秋告辭菴付僧伽梨并與書曰日本國千光院大法師宿有靈骨洪持此法不遠萬里入我炎宋探蹟宗旨乾道戊子遊天台見山川勝妙生大歡喜至石橋焚香煎茶禮住世五百大羅漢尋返本國夢境恰恰二十年雖音問

不繼而山中耆宿歷歷記其事今又再遊此方相從老僧宿契不淺志操可貴不得不示法旨昔釋迦老子將圓寂以正法眼藏涅槃妙心付屬摩訶迦葉二十八傳而至達磨六傳而至曹溪又六傳而至臨濟八傳而至黃龍又八傳而至予今以付汝汝當護持佩此祖印歸國布化開示衆生繼正法命又達磨始傳衣而來以爲法信至六祖止而不傳汝爲外國人故我授此衣爲法信則乃祖又曰菩薩戒禪門一大事也汝杭海來問禪於我因以付之副以應器坐具寶餅拄杖白拂其圖迦文以下十八祖達磨以來至

虛菴五十二世嫡承系連西頂受而出到奉國軍乘
楊三綱船著平戶島葦浦岑本朝建久二年也戶部
侍郎清貫營構小院請延居之始行禪規海參津萃
遂入王都不唱宗乘先是能忍始勸禪法措紳緇白
疑怪毀之今復西到欲混忍而擯筑之菅崎有良辯
者嫉西禪化將與台徒訴朝竄遂譏評紛如上詔藤
相國兼實召西府稟傳主當令仲資徵問尚書左丞
宗賴與聞焉西排斥和黨舉揚真乘乃謂我禪宗者
非今特有之昔睿山傳教大師嘗製內證佛法相承
血脉一卷其初條卽我達磨直指之禪法也今夫良

辯昏愚無知率黨訴朝禪宗若非則傳教亦非傳教
若非則台教不立台教不立則台徒豈拒我耶甚矣
法裔之闡其祖意也豈只示有識卻助西言良辯一
昔夢西自宋國齋白米來普種諸州覺後改悔鑽仰
歸伏間有誹者辯曰勿以言之非汝等毀譽境東西
示衆曰我此禪宗單傳心印不立文字教外別傳直
指人心見性成佛其證散在諸經論中今且出少分
以論汝等法華經曰唯佛與佛乃能究盡諸法實相
諸法寂滅相不可以言宣華嚴經曰初發心時便成
正覺涅槃經曰如來常住無有變易楞伽經曰如來

清淨禪淨名曰心淨佛土淨大般若曰第一義無有
文字毘盧遮那經曰我覺本不生出過語言道解節
經曰自證無相法離言說四事文殊問經曰此法不
思議離於心意識占察經曰一實境界者謂眾生心
體從本以來不生不滅自性清淨起信論曰離言說
相離心緣相智度論曰般若波羅密實法不顛倒念
想觀已除言語法亦滅是等文繁若細引證更僕不
盡又曰此事在行住坐臥處添一絲毫也不得滅一
絲毫也不得便任麼會去更不費些兒氣力纔作奇
特玄妙商量已無交涉所以動則生死之本靜則昏

沈之鄉動靜雙忘顛預佛性總不任麼畢竟如何若
是目外明宗終不言中取則直下便見撩起便行箭
已離絃無返迴勢千聖也摸索不著或未到此田地
切忌麤心大膽一向掠虛到臘月三十日總不著建
久三年筑之香椎宮側構報恩寺始行菩薩大戒布
薩六年乙卯州之博多開聖福寺建仁二年金吾大
將軍賴家源公營建仁禪苑於洛東延居開山祖三
年六月尚書省劄置台密禪三宗於寺繇茲構真言
止觀二院學徒叢萃元久二年春畿內大風都人僉
曰比來榮西新唱禪宗其徒衣服異製伽梨博幅直

祿太袖行道之時特包颶風今之風災因於西也巷
謠甚喧達于天聽帝詔有司驅西出都西聞救下曰
是吾法成之秋也亟往堀川擇求材木諸徒匿笑西
答官使曰風者天地之氣其神曰飛廉豈西之所作
乎若又有人能作風者其人尤靈不為凡推此兩端
西無可出都之理而聖主不可漫加放逐矣官使復
奏帝曰然也重救宜曰無所羨乎乃陳寺之營構上
建仁為官寺備有司監護殿堂盡極輪奐建永元年
秋九月主東大寺幹事僅四載修營成承元二年洛
東法勝寺九層塔火救門下侍郎藤公經監知修營

豫周二州充其費用三年八月未成一級又救西司
造興落成亦如東大初平侍郎奏賜紫衣建保元年
救擢僧正三年乙亥相州龜谷營壽福寺一日辭源
僕射實朝僕射曰師老且病寺亦未畢西曰我將入
王城取滅耳僕射曰至人出沒豈擇地耶西曰都城
士民初聞禪宗疑信過半我當唱末後句顯煥王都
命駕歸京六月晦日布薩之次告眾曰孟秋初五吾
當取滅矣都下喧傳聞于丹禁洎期帝遣中使問候
西對官使日期已瀕矣而資氣首健諸徒且訝晡時
坐椅安庠而化中使路上聞稱遷化又見彩虹現於

寺上也世齡七十五法臘六十三西在宋時捨錢三百萬星架萬年寺三門兩廊又修觀音院智者塔院在天童日虛菴欲建千佛閣西啟菴曰吾歸國後當致良材歸朝翼歲鉅材若干捆載大舶送天童山乘是閣成寺主爲作堂祠焉嘗謂衆曰我歿三十年禪宗大興果如其言後世推爲本朝之禪祖也平生著述興禪護國論三卷一代經論總釋日本佛法中興願文三部經開題等各一卷密部特多不可盡記明上天竺沙門蘭閑叟撰塔銘焉

贊曰欲識佛性義理當觀時節因緣西公欲始取滅

於佛國而關塞不通留滯委遲傳佛心宗思出望外縱親拜靈山遺跡若遭於是時耶既爲本邦禪宗第一祖豎法幢唱大法時遇巽二之難則單付是天地之氣法受張三之謗則徧證夫經論之文其智辯之無礙也如神禹之疏九河注諸海若俾疑滯三密八教之場安能如斯蓋皆有因緣也如今諸方遇勝因者鑑戒猛省迺祖之道尚存於一髮焉矣

論曰茫茫世界庶類恒沙細縷幻生焉倏忽漚滅矣人處其中而顛倒邪正種子生現行現行習薰種三法循環生歿無輟太覺世尊救此迷情相經盈海歷

一千歲摩騰竺法蘭負馱東渡從此秋客夏僧聽言
搃意翻譯大備本邦諸師傳其宗法道復東矣因以
法本居首科或曰釋書本朝之僧史也初置傳智今
何革之通曰支那之二僧傳初置譯經贊寧云譯經
佛法之本也原夫經能詮法所詮不相差離譯經與
法本者名異而同若立傳智雖徧於教而不徧於禪
何者禪以心傳心不立知解謂法本則教禪通且此
書大概取法例於三僧傳也又曰釋書慧深列古德
科以達磨載于編首今卻反之寧爲僭越與通曰物
有本末事序首終者常之理也台教曰毘曇雖劣是

爲佛法根本也夫二師之蹟不詳若無德業百濟王
何貢獻之以例言之亦此方之騰蘭也居于冠篇何
僭越之有故以觀勒福亮智通智鳳仙那道璿同科
列次焉達磨片岡不須重譯酬唱和歌雷空棺于故
衣顯臨終之遺付慧觀來說中百門智之論道昭往
稟八五三二之旨智藏說空宗於法隆寺裏無良納
密經於久米道場審祥講華嚴於毘盧大殿鑑真授
波羅提木叉而開戒壇招提二刹最澄播台教於睿
山空海弘真言於高野榮西唱黃龍宗於建仁竺支
韓和之諸大乘基挹阿耨達池之本流而注扶桑神

州之東域矣嗟乎法王之教令廣矣哉大矣哉三千大千世界靡不利而暨蓋又一心之所變緣起無方天長地久劫石有消日而法本無盡時焉

本朝高僧傳卷之三
...
...

音訓

屬 居例切 悚 息勇切 紉 音創 芟 師衙切 愆 苦堅切 賻

防父切 呱 亥乎切 礪 力霽切 隸 力霽切 倪 研奚切 颯

卑遙切 匿 女力切 酋 慈秋切 訝 五駕切 塞 先代切 巽

蘇 困切

江府住玉泉軒成九居士信施淨財鑿

本朝高僧傳卷三 茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺 知藏比丘 識

[Faint bleed-through text from the reverse side of the page]

本朝高僧傳卷第四

濃州盛德沙門十師蠻 撰

淨慧二之一 和州龍門寺沙門義淵傳

釋義淵姓岡連氏和州高市郡人父母無子禱觀音
像一夕庭際聞有呱聲覓之帛裏嬰兒在籬香氣芬
郁收養早長天智帝敕隨太子共育內宮天成年穎悟
好玩佛書敕俾出家從元興寺智鳳學成唯識遊訊
諸方益究玄緻於宇多郡開構龍門寺盛弘法相學
徒聞闡受業者如玄昉行基道慈良辨宣教良敏行

達隆尊輩皆一時豪傑也。文武帝賜稻一萬束，資助齋廚。大寶三年，敕任僧正。淵受七帝之崇嚮，二嚴兼備。營建尤多，龍蓋龍福共極。輪囷神龜四年冬，十二月，聖武帝賜敕黃曰：「義淵法師禪枝早茂，法梁惟隆。扇玄風於四方，照慧炬於三界，加以自先帝御世迄於朕代，供奉內裏，無一咎愆。念斯若人，年德共高，宜改市往氏，賜岡連姓，傳其兄弟。翼歲十月某日，示滅於高市龍蓋寺。帝聞訃，哀慟命治部官監護喪事，賜絹一百匹，絲二百絢，綿二百屯，布二十端矣。」

七帝聖恩，無八人神足，丰宴居菩薩行道貌，何從容。和州大安寺沙門道慈傳。

釋道慈，姓額田氏，和州添下郡人。自少出家，天生靈敏，稟三論於法隆寺，智藏學法相於龍門寺，義淵涉魯誥，有文才。大寶元年，入唐請益，乃屆長安，謁善無畏三藏，受求聞持等密法，遍路勝地，親見明師。唐帝選召義學高僧一百員，講仁王般若經，預選人官。憐慈遠客，特加優命。在唐十八年，經論史集遊練，心曲貫通，要英以開元戊午歸。當本朝養老二年，矣。敕居大官寺，弘三論，始講慈恩疏說戒疏。翌歲元正帝

詔曰道慈法師遠渡蒼波覈異聞於絕境遐遊赤縣
研妙機於祕記參跡象龍旌英秦漢戒珠如懷滿月
慧水若瀉滄溟倘使天下桑門智行如此者豈不殖
善根之福田渡苦海之寶筏朕每嘉歎宜施食封五
千戶標揚優賞用彰有德天平九年聖武帝將新大
官寺下詔覓伽藍制式皆無知者慈奏曰臣僧在中
華時見西明寺私念異日歸國苟逢勝緣當以此爲
則寫諸堂之規襲藏巾笥今陛下聖問實臣僧之先
抱也以圖上進帝大悅曰朕願滿矣詔任律師監造
寺事重賜食封一百戶扶翼侍子其餘賚賜若干品

慈有巧思延袤長短自督繩墨工匠歎伏歷十四年
而成賜額大安救慈主席九年丁丑冬十月帝啟最
勝會於大極殿詔慈爲講師聽衆二百人稱嘆雄辯
其性耿介不與時合解印嘉遯竹溪山寺愛烟霞友
麋鹿一日長屋王設宴招慈以詩辭曰素緇杳然別
金漆諒難同衲衣蔽寒體綬鉢足肌隴結蘿爲垂幕
枕石臥巖中抽身離俗累滌心守真空策杖登峻嶺
披襟受和風桃花雪冷冷竹溪山冲冲鷺春柳雖變
餘寒在單躬僧旣方外士何煩入宴宮坐客見詩益
服高操十六年甲申十月某日示寂歲七十餘夏臘

若干

贊曰慈公入唐留學多歷歲月研覈六宗接四方賓博識高行保後凋節宋蔣公設宴招政黃牛政辭以詩曰昨日曾將今日期出門倚杖又思惟爲僧只合居巖谷國士筵中甚不宜與慈公志操句格相似而此先彼後焉按夫西明寺取規於天竺祇園精舍祇園暮晚率內院本朝梵刹之制度無可與大安寺齊齒苟俾一宇存則見者肅焉發菩提心今已丘墟矣悲乎或人畜大安寺古圖余摹寫一本以寓懷古之歎也

和州元興寺沙門智光傳 禮光

釋智光河州人從智藏僧止受三論且性情純真普涉經論住元興寺講說空宗同寺禮光亦師智藏俱有令名暮年誓絕言語凝觀想數歲而卒光歎曰禮者少年親友不知受生何方土追憶不輟夢到禮居金殿銀樓華臺玉扉寶樹珍禽種種勝境乃問是何處禮曰極樂界也予以常憶我暫能至此可速歸去光曰安養界我所願也惡用歸邪禮曰子無淨業何得居光曰顧公平生之行未有邁我惟近來持不語耳我何罪焉禮曰我昔普見經論往生資糧無加觀

想是以絕言語謝人事四威儀中唯觀彌陀相好淨
土莊嚴今生樂邦子身意散亂無淨土因卻詰我邪
光聞悲泣曰何為可得往生禮曰須問彌陀引光詣
佛所莊嚴光彩又邁禮處乃稽首白佛曰何等是往
生正業佛言觀如來相好及淨土莊嚴是為正業光
曰今見此界廣博嚴飾心眼不及況又如來相好豈
凡慮之所堪邪於是彌陀即舉金色右臂放大光明
掌中現小淨土嚴飾備足令其具見既寤命畫土圖
掌中淨土構殿安置號極樂房以充觀想後吉祥而
終其圖現在元興寺世人爭模寫焉光精於空宗著

華玄畧述等書當曰三論有二一者部別三論中百
十二是也二者義別三論破邪顯正言教是也其義
別者一切邪法也故破之一切正法也故顯之邪正
平等法界宛然是名言教又依曇鸞義著天親菩薩
往生論疏釋五卷

贊曰禮光以觀想取生樂國智光因憶想能到回想
淨念遂奉觀彌陀佛見小淨土昔梁僧濟夢無量壽
佛接置於掌遍至十方是皆停觀專純感於報佛自
受用身眾人若能修想如一光者莫不往淨刹也經
曰阿彌陀佛去此不遠先佛豈有虛語耶

系曰鍊師曰今之三論家皆睿之子孫也明僧高泉亦將錯就錯焉余按不爾智藏下出道慈智光禮光三傑而光下有靈睿睿下有玄覺漸安藥寶寶下有隆應品慧一燈而絕慈下有善議議下有勤操安澄二師從此宗派流行今之空宗皆慈公之裔也

和州元興寺沙門神睿傳

釋神睿唐國人不詳師承義淵之徒與天資爽拔義解絕倫博究法相兼善羣經三論詔住元興寺高立法幢黑白歸向世言得虛空藏菩薩靈感著老三年冬十一月元正帝詔僧綱曰朕聞優鈍崇智有國者

所先勸善將學爲君者所務於俗既有於道宜然神睿自幼卓絕道性夙成撫翼法林濡鱗定水不踐安遠之講肆學達三空未漱澄什之言河智周二諦由是伏膺請業者已知實歸函丈挹教者悉成宗匠戒珠月圓慧水波淨朕每讚歎在懷宜施食封五千戶闡揚褒賞以旌其德天平元年冬十月敕任少僧都與大安寺道慈並名時稱天下桑門之秀也九年某月日安座而化

和州法隆寺沙門行信傳

釋行信溫良律身從智鳳行基二師聽慈恩教廣達

異部聖武帝屢召聞法敕住法隆寺爲鎮寺法主太子豐聰開基已來歷一百二十歲伽藍未備天平十一年信奏興建帝命藤不比等監視創營凡歷九白寶殿回廊講堂樓閣皆悉落成敕講法華開題之日帝親臨幸聽徒如林信又祝國家安寧撰仁王護國經疏三卷最勝王經音義一卷詣關上進敕任大僧都管七太寺檢校欲自寫五部大乘經以度於寺追數軸成以老病化實天平寶字年中也寺衆大其功業於今忌日撞鐘供饌諷經堂中焉

和州元興寺沙門隆尊傳 良敏

釋隆尊不詳何許人從義淵僧正受唯識宗兼聽華嚴綜錯積日理義入神隨衆屈請住元興寺律行粹然謙光外逼聖武帝聞任以律師尊諷舍人親王曰性素頑愚未委篇聚今任律師恐忝聖授且國家無戒師也尚矣我欲入異域質於律範而才力乏慮遺國之恥故不果行方今興福寺義學生榮睿法師護鵝戒淨嚴岬思覃天生隱逸誓居濃州使此僧入唐請名師來流布戒法於國家是吾所願也親王執奏帝納其言卽敕睿及大安寺普照封幣入唐天平勝寶四年三月中旬東大寺盧遮那佛大像成皇帝太

上皇太皇后聯輿幸寺入殿拜佛是日設大會齋供養萬僧敕尊為道師緇素相稱為一世之榮也天平寶字四年閏四月十八日寂于元興寺別院壽當大行數焉又有釋良敏從義淵僧正受法相致要才博德邵與尊相次朝廷崇信擢于大僧都領元興寺贊曰先他而後已者菩薩之行也羅漢已下所絕而不為也尊公奏榮睿普照入中華倡律匠來使天下國家始知毘尼大法焉夫本朝戒範雖權興于鑒真而其本者發軔於尊公且夫事者以發軔為貴焉故佛說法會以發起人列于七眾之首以此故也觀尊公之行實登地之人也哉

和州東大寺沙門良辨傳

釋良辨姓淺部氏相州人或曰百濟氏江州志賀人禱觀音而得在襁褓時母出采桑置兒樹下大鷲攫去放于南都春日祠前義淵僧正偶詣神祠拾得養之五歲就學心地英發舉一隅而既知二隅及長剃具授以法相學解增進該貫諸部天平五年聖武皇帝建霜索院於添上郡辨時在郡構一小院安居誦經一夜執金剛像發光照殿又誦經聲徹于宮中中使承命跡聲到院辨日常祝聖安祈伽藍營臣僧愚

願恐達睿慮，與中使以聞。帝喜其奏，賜緡索院官府給糧造營，已成號金鐘寺。嘗發大乘心願，興華嚴偶，因感請審祥禪師，始講雜華於金鐘寺，列衆聽稟。又招道融說梵網經，修淨住法，是本朝布薩之始也。天平勝寶二年，帝慶東大寺，賞任少僧都。明生夏，敕差住持兼司法務。諸寺欽德，八年轉大天平寶字，進爲僧正，辨以護法爲責任，以修營爲皇蹟。凡管主務，十有二年。諸堂戒壇，麟次昇建，皆因辨之勸奏也。初，帝鑄十六丈透那銅像，多聚金用塗飾。此時本朝之金帝語辨曰：聞金峰山其地黃金也。師祈金剛藏王，

得金裁像，不亦宜乎？辨乃入山持念藏王，告曰：此山黃金，我不敢恣也。江州湖西勢多縣有山，是觀音靈應之地也。子至彼持念，必得黃金。辨如勢多老翁坐大石，釣辨問何人。翁曰：比良明神。言訖，卽隱。辨慮石上安如意輪像，持修未幾，與州貢金，辨刻丈六大悲像及金剛藏王金剛神，夷其趾得五尺寶鉢，益以爲靈區。貴賤讚禮，成大寶刹，以辨爲第一世。又甲賀郡創金鐘菩提二寺，相州開大安寺，共爲名。藍世曰：辨朝出南京巡行，江之三利，暮歸東大辨母，尋兒政涉山川，祈佛禱神二十餘年，竟不相知。偶巡畿內，舟泝

浞河或人語曰世有希事南都良辨僧正年三十餘
學超儕輩擢為帝師昔靈鷲所撰義淵僧正收取鞠
養今成國寶母聞疑之乃往東大伺辨之出投書告
事辨曰我行止偏如姬言尚有據否母曰我昔無子
祈之觀音而得吾子因刻小像繫兒衣頸不知有諸
辨嗚咽曰吾七歲時思親不輟先師以像授我曰吾
得汝時像在不頸汝父母所繫汝思父母瞻禮此像
是以奉持未嘗離身即出呈母母子相得悲喜泣淚
構舍寺側終世孝養辨以寶龜四年閏十一月十六
日化於所住墓於宇陀郡赤尾山林春秋八十有五

矣辨器度洪恢智福兩全付大法於聖王及皇后又
有實忠良興良慧忠慧等神足八人各管東大弘華
嚴教

贊曰興大法者必有勝因而存焉辨公之靈鷲者太
經初興之善介而是華嚴會上根熟之所成也當時
有金鷲菩薩之稱者益又宜當矣

和州元興寺沙門嚴智傳

釋嚴智初學法相三論後從祥公受華嚴住元興寺
倡賢首宗天平之季奉敕講華嚴於金鐘道場以標
瓊性泰為覆師畢六十卷又弟子智憬奉詔為講師

登春福為覆師講六十華嚴并疏二十卷

贊曰如來初轉輪之後舍利弗唱第二轉經所以使
眾會重知佛說也講經之覆說是其遺意而梁唐儘
多訓忍證智等諸師依聖王之教互為主賓講覆展
轉瀉法不漏翻毘盧法海於舌端不宿結七處之緣
如何能預此會豈又有如聾如啞者邪

和州大安寺沙門修榮傳

釋修榮不詳其氏想唐人矣久隨仙那遊刃三藏又
就道璿益研戒學教任傳燈大法師位止大安寺盛
弘師道俯屬文藻風彩可觀嘗撰仙那行狀略曰昔

騰蘭聿來澄什利往停跡振且之邦未躡日域之境
計遠論勞彼有愧德自非位超修成行積永劫其孰
契於茲乎復造仙那肖像繫贊六首其一曰至象無
色大道無名湛然常住非滅非生隨機汲引應物兮
形發揮正教如谷傳聲其二曰道不自弘弘之在哲
猗歟聖主海內有截接武異人連肩英傑慈訓惟闡
慧燈斯徹其三曰德必有類道非獨顯綽綽行基幽
贊妙典起予聖寶揄揚羣善竭誠致敬超羣惟腆其
四曰藏山易迷閔水難息仰德酬恩昊天無極幽誠
曷寄寫像追福遍及無邊廣覃有識餘略之

和州興福寺沙門慈訓傳

釋慈訓姓船氏河州人聰敏能解初隨興福寺玄昉學法相又依良敏僧都稟唯識訣後就審祥和尚聽華嚴經天平庚辰冬祥師講華嚴訓與鏡忍等遵命覆講其後隨處專唱法相稱德帝貴其道行賜莊田若干畝天平勝寶四年敕任僧都天平寶字元年奉詔爲興福寺主務此職以訓爲始遠學賓歸入其門如衆流朝於海焉寶龜八年某月日化於別房弟子釋永嚴承訓師法任傳燈大法師位以相宗化當世出行賀常騰二傑

系曰明僧高泉云訓師南遊親傳其旨於法藏歸付辨公世其宗故此方之宗賢首者推訓師爲始祖余按是大不爾新羅審祥禪師人唐見賢首大師傳雜華來住大安寺爲本朝華嚴始祖良辨上足其室得親付囑稱華嚴發願初興之大士遊祥師門者靡不欽德而先一輩於訓公何有不足而稟之訓公元法相宗專唱本宗於興福傍從祥師兼學大經未聞其始祖且入唐之事國史不見有何所據云親見法藏乎賢首大師唐先天元年化先訓之寂六十六年歲月亦似甚隔也凡編僧史者入其示管其事尚或謬

多矣況異域之僧而述本邦事差誤如拾祇足取無
稽之謂焉

和州東大寺沙門鏡忍傳

釋鏡忍生英悟少事祥師早解頓教為眾覆講祥之
滅後承嗣良辨天平甲申奉詔與慈訓圓證講華嚴
於金鐘道場稍及三年終八十卷開序題日帝臨證
明寶龜五年有旨重東大寺自律師昇進任僧都延
曆二年某月日寂

和州大安寺沙門行表傳

釋行表不委氏族和州葛上郡人博綜經律為江州

講師天平十五年表於興福寺北倉院就唐道璿重
受戒法時年已七十三臘五十三璿稱曰此老比丘
為法忘身心無貢高實可貴也乃告曰篇聚者潔身
儀耳我有心法曰祖師禪昔三藏菩提達磨大師自
西天來付此法於慧可僧璨道信弘忍神秀七傳至
我師普寂我師初在嵩山傳唱禪法道聲聞帝辰詔
入東都居華嚴禪苑故世曰華嚴尊者我從華嚴得
法今以付汝即廣說法要表忻然領受住大安寺熾
弘教觀晚以心法付上足最澄延曆十六年化春秋
一百四十歲

贊曰虛已應物必究千變之容挾情適事不觀萬殊之妙此語誠哉表公年倍璿師獨切求善庸知先後於吾乎遂以虛已謙下傳心法若挾一己之情安能有觀佛祖妙道然耄頤得道今古以爲難宋有大悲閑長老和有表公而已展法中之傑也

和州東大寺沙門堪久傳

釋堪久桓武帝之子宿殖善因希求必藉隨東大寺良慧僧都脫珍御服著割裁衣神情朗爽卓爾超羣加又好學慧解川增從事毘尼尤究華嚴延曆十四年住東大寺張三學之席接四來之賓是歲空海登

壇就久受具足戒一住四年寺衆歸德以戊寅歲解印而退不詳其所終矣

江州梵釋寺沙門施曉傳

釋施曉學涉內外延曆五年春桓武皇帝創梵釋寺於江州敕曉住持十一年春曉奏曰竊以真理無二帝道惟一敷化之門雖異覆載之功乃同故衛護萬邦唯資於佛化弘隆三寶靡非帝功又夫沙門釋子三界旅人離家離鄉無親無族或坐山林而求道或蔭松栢而思禪雖有避世出塵之操不忌護國利人之行而糧粒罕得飢餓常切伏望本州國分之供分

給彼所然則緇徒得不虞而修聖恩有不督而化又
 奏曰山背之民秦氏及男女等三十一人自寶龜三
 年迄今年每歲春秋悔過修練其精誠實可憐伏願天
 慈賜度又旌善之一化也制可是歲腴田百畝納梵
 釋寺十四年秋九月詔曰真教有屬隆其業者人王
 法相無邊闡其要者佛子朕位膺四大情存億兆導
 國齊禮雖遵有國之規妙果勝因思弘無上之道是
 以披山水之名區艸創禪地盡土木之妙製莊嚴伽
 藍名曰梵釋寺今置禪師十員三綱在其中納江州
 田千畝越州封五千戶以充寺供修造之費所冀運
 邁馳驟永流正化時變陵谷恒崇仁祠以茲良因普
 輦一切上奉七廟臨法界而增尊下及萬邦登壽域
 而洽度

和州秋篠寺沙門善珠傳

釋善珠姓阿力氏南京人或曰藤太皇后之孽子也
 少歲不興福寺從玄昉習法相天性神悟勉學不輟
 屬于溽暑頭如熟瓜鬢髮半落確乎不撓未至弱冠
 博該三藏通貫唯識尤精因明君臣欽尚四眾稱奉
 睿山根本中堂落慶供養之日傳教大師請珠為導
 師初早良太子與藤黃門種繼有卻竊命近臣射殺

日本撰述 本朝高僧傳卷之四

種繼天皇大怒將殺太子太子遣使諸寺預修冥福
諸寺皆拒珠獨納使曰太子以宿殃受嚴譴今幸還
積勿結怨矣諭勉激切使者反命太子喜曰我聞師
言披忍辱衣不怕逆鱗既而謫淡路遂於中路斷食
而殂延曆十六年早良之靈逼惱皇子鑿巫無効敕
珠持念珠告靈曰昔聞貧道言已披忍辱衣今何作
怨乎講般若經皇子病瘳天皇大悅擢爲僧正是歲
四月某日化壽七十有五臘若干歲珠常念彌勒時
人僉曰上生兜率先是以誤唾僧房壁黜下鷲衣鉢
買奇香煎洗遂志珠滅後歷數十年壁有香氣云樸

述甚多唯識燈明鈔十二卷唯識肝心八卷因明論
燈鈔六卷了義燈增明記四卷彌勒經畧贊最勝王
經遊心訣梵網經略鈔各三卷法華肝心藥師經疏
八石經私記法苑林章記各一卷其餘者不遑錄記
學者於今祕珍焉

系曰國史記曰珠少魯鈍學唯識宗習因明論昏室
不通以此爲恥余謂爲百世之師者從幼穉時英氣
自萌譬如橡樟在蘗栽中含棟梁姿渥注驥兒落地
千里以相宗中興之才稱慈恩之再身珠公而何魯
鈍哉寬文丙午偶夏平南都法隆寺九旬聽唯識論

一日寮主歎談之次抱述記鈔十卷置前曰此珍書也余繙閱之其政自書曰沙門善珠十九歲撰而理義浩瀚不遺涓滴使見者拂波而鑒水焉夫慈恩大師註論刻意覃思簡古幽蘊老成又猶憚下筆況未盈弱冠著書精詳如斯非上知而何孟子曰盡信書則不如無書千載明語也且作史傳者搜索不周不照前後則多誣古德自陷瞽史之坑可不慎哉今釐諸策革古史以立珠公傳不爲僭越耳或曰國史記後人之作也豈其然與濟北師復生不易我斯言矣

和州東大寺沙門明一傳

釋明一姓和仁氏執性穎利博記經疏居東大寺論揚真教辯論秀拔學者多歸晚置婉閨時人相謂蒼荀雖凋尚含四照之色芝蘭半落亦送十步之芳延曆十七年卒壽七十一著最勝王經註十卷法華畧記四卷法華記二卷大寺門一
系曰濟北和尚以時人之稱棄緩采急明一慈寶並載釋書今且隨而存其一傳如慈寶者不足言之
有博才不固晚節余謂官愆衰老或容置後房便於坐臥而追羅什之塵歟丈夫所守不死婦人之手況於沙門乎吁二子者蓋學後世之下惠耶

和州興福寺沙門行賀傳

釋行賀姓上毛氏和州廣瀨郡人年至大學隨永嚴法師出家二十受具足戒依元興寺平備已講稟唯識天平勝寶五年承敕入唐學法相天台兩宗留唐三十一年歸或曰七年傳來經疏一百餘卷詔付少學三十人稟其業又敕東大寺明一歷試所學詰問二教頗有空礙一卽罵曰久經歲華學植膚淺何乖朝宗哉賀大愧垂淚執政議曰長途一躡何妨千里之行大樹折枝豈忘百畝之蔭聖帝怜深壽授大僧都別構小房觀法閱書一日異僧來謁垂泪曰背發惡瘡

苦痛難忍醫曰截高僧左耳貼瘡得瘳不然七珍山積不可治療或人勸曰往訴上人必有方便是以特來願慈悲哀憐其瘡潰壞膿血淋漓賀曰我耳可病甚以爲易乃取剃刀截左耳與之旣以殘醜移居輪與世絕交專修定心夢觀音薩埵摩頂曰前年所賜今全還之慈心至深此後莫懈賀驚覺探耳朵輪廓如本感大士之妙驗悲喜交集遐邇傳聞歎未曾有延曆二十二年二月十一日恬然而終歲七十五臘五十六賀在唐時朝廷供養百員高僧賀居第二座自少研精家學所著巨多法華弘贊二十卷或曰二十

五唯識論會記三十卷淨名經畧贊五卷百法論註
二卷唯識義暉唯識樞要義唯識義精唯識比量遣
偽興真章各一卷

贊曰任人之需而施身命者吾佛因地之忍修也如
忍辱太子與眼睛於佞臣因緣多在經論賀公截耳
施者佛弟子之所為而是菩薩大人之行也至其滯
於明一之問人或有智行備而疎言論者所謂凡夫
尚通三藏羅漢不知赤鹽之類也學者須要觀賀與
二之智行義學如何

和州梵福山沙門善謝傳

釋善謝姓不破氏濃州不破郡人識度純粹志標翹
然從理教法師稟法相困學不弛遂通六宗人挹高
德桓武帝尚其道賜僧職晚入梵福山屏絕人事修
安養業延曆二十三年夏五月寂于梵福壽齡八十
親友屢夢謝生極樂矣

城州愛宕山沙門慶俊傳

釋慶俊出于河內藤井氏在幼純信意樂佛教至辨
李歲隨大安寺道慈削染納戒慈教以三論法相華
嚴又就勤操受求聞持法專攻雜華四法界十玄談
融攝指掌住大安法華之名藍說諸大乘經四眾盈

席聲播輦下，敕任僧都。天平勝寶夏五聖武帝崩，敕後知法事。天應元年，春光仁帝賜愛宕山，此山崔嵬，獨秀。帝畿雖泰澄小角披榛莽，而梵刹未備。檀越和氣氏風靡，俊德構堂建院，僧事略整。從此陟降接踵，衆推中興。輕財重義，戒檢尤急。所到啟建，菩提道場。構普光殿，修兜率淨業。延曆某年九月三日，寂垂年九十。

和州大安寺沙門戒明傳

釋戒明，姓凡直氏，讚州人也。弱冠依大安寺，慶俊久學華嚴，究其奧旨，兼採異聞。實內緇輩，欽望慧解。寶龜季，奉敕入唐謁時宗匠，遍遊勝地，往金陵龍華寺謁傅大士像，又登城南半亭山，見瑯琊王大墓碑，碣石人石柱，麒麟獅子行列，侍衛道路兩廂。至誌公宅，請得誌公真身觀音大士畫影，而還安大安寺。南唐院招衆供養，又以持來經論疏章表上闕廷。十年己未，城中僧都會大安寺，曰：大佛頂經是偽經也。使明奏朝請以焚燒，蓋以此經始渡，收在王府也。明日毀大乘經者，身壞命終。一念之間，遍歷十方地獄，盡劫無出期。經有明文，吾去歲在唐，廣平皇帝親請諸山高僧講大佛頂經，何言偽經乎？諸大德欲奏朝各自

日本撰述 本朝高僧傳卷之四 九

連署我不黨也衆僧伏理議寔不行明以延曆年中
逝矣

系曰首楞嚴經者大覺世尊以法華後涅槃前在尸
羅跋城祇園精舍爲諸大菩薩說圓大究竟法大唐
神龍元年中天竺沙門般刺密帝翻譯烏菴國沙門
彌伽釋迦譯語正議大夫清河房融筆受總有十卷
諸佛心印菩薩行門所謂了義之中了義也是故教
禪諸師註釋七十餘家至今不止聖經東來無如斯
盛也智者大師常憾不見向西遙禮今此衆僧幸遇
勝緣卻生邪見而欲燒之凡聖相戾一何其乎嗚呼

五逆天壽何世無之若無明公之救之阿鼻輪迴寧
論劫數乎哉

和州興福寺沙門仁秀傳 正義

釋仁秀姓物部氏豫州人也從慈訓僧正學業超邁
住興福寺能說法相大同三年三月某日寂出願安
一人又釋正義初從慈訓學法相及華嚴訓稱才解
住和之藥師寺講華嚴教賓盈席矣

本朝高僧傳卷第四

音訓

闐闐

上亭年切 下烏結切

德

去乾切

隴

盧容切 喉也

頤

延知切

苾蒭

上薄密切 下魚列切

楚俱切 梵語

孽

魚列切 庶子也

注

烏瓜切

貼

他協切

翹

郝堯

弛

詩止切

江府住玉泉軒成九居士信施淨財鏤

本朝高僧傳卷四

茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺

知藏比丘

識

終